

Zeitschrift: Annalas da la Societad Retorumantscha
Herausgeber: Societad Retorumantscha
Band: 81 (1968)

Artikel: Nos giubilars
Autor: [s.n.]
DOI: <https://doi.org/10.5169/seals-228395>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 08.02.2025

ETH-Bibliothek Zürich, E-Periodica, <https://www.e-periodica.ch>

Diu. Quellas ein stadas encoronadas da duas commemoraziuns regiunalas dils 18 da zercladur 1967 a Zernez e Casti e dalla fiasta centrala dils 1/2 da fenadur a Cuera.

A Zernez han ins festivau quella occurrenza cun in til, produczions da cant e musica ed in giug festiv da Jon Semadeni. Il cauredactur dil Dicziunari rumantsch grischun, dr. Andrea Schorta, ha giu l'honor da tener il plaid festiv en sia vischnaunca nativa. Tuchiez e fiugs sils aults han annunziiau la fiasta a Casti, che ha era buca schau muncar da seregordar cun cant e musica e cun in giug festiv da Sur Gisep Willimann da quei impurtont eveniment historic che Sur prof. dr. Raimund Staubli ha dilucidau en siu plaid festiv. Cun ina recepziun dils hosps, produczions da differentas societads ed in giug festiv e buca il davos cun ina gronda fiasta populara ha Cuera, la capitala dalla Ligia Casa da Diu, inaugurau igl 1 da fenadur la fiasta centrala. Quella ha entschiet l'auter di cun in act festiv ed il plaid commemorativ da dr. Hans Meuli, rector alla scola cantunala. In imposant til festiv cun gruppas ord igl entir intschess da quella Ligia ha delectau las roschas d'aspectaturs. Sut la regia da Jon Semadeni han gruppas ord ils treis intschess linguistics (Puschlav, Grischun central e Cuera) dalla Ligia giubilonta aunc repetiu en ina sequenza da maletgs il giug festiv «Carstgaun e libertad ella Ligia Casa da Diu».

L'Uniun grischuna Turitg ha festivau dignamein siu giubileum da 75 onns. Sut l'amicabla devisa «Il Grischun salida Turitg» han las festivitads entschiet ils 2 d'october 1967 cun ina recepziun dalla pressa en preschientscha dallas autoritads. Cuss. guv. dr. Leon Schlumpf ha plidau davart «Problems economics dil Grischun» ed il president dall'uniun giubilara, Christian Schmid, davart «75 onns Uniun grischuna Turitg». La fiasta principala ei stada ils 7 d'october 1967 cun cooperaziun dallas differentas organisaziuns grischunas da Turitg e contuorn. Dr. Josias Sprecher, president dil Cussegl grond grischun, ed in representant dalla regenza da Turitg han giu ils plaids festivs. Quei anniversari ha senza dubi fatg nescher novs ligioms denter ils Grischuns a Turitg e denter il marcau alla Limmat e nies Cantun.

Nos giubilar

En buna sanadad corporala e spirtala ha igl anteriur caustaziun da Rueun e poet Luis C a n d i n a s saviu festivar ils 20 d'october 1967 siu anniversari da 75 onns. Per quella occasiun ei cumparida ina

biala collecziun da sias poesias sut il tetel «Ord miu truchet» che s'aschunscha al tom «Sulegliadas» publicaus avon passa 10 onns. Il simpatic poet popular ei aunc adina activs.

Ad Andeer ha dr. Benedetg M a n i cumpleniù ils 22 da december 1967 siu 75 avel di da naschienscha. Ton sco redactur sco autur da differentas lavurs ha il giubilar mussau sia attaschadad alla cultura e viarva romontscha. Aschia ei era il bi ed interessant «Cudasch da Schons» cumpariù avon 10 onns sut sia tgira ed ha anflau tala accoglientscha ch'ina secunda ediziun ei daventada necessaria.

Ils 25 da fevrer 1967 ei dr. scienz. tech. Paul J u o n passaus sur la sava dils 70. Ina instructiva scartira festiva preparada da siu amitg dr. h. c. S. Loringett relata davart la veta ed igl operar dil giubilar ch'ei buca d'origin romontsch, mo che ha regalau a nies pievel ina roscha raquens, lavurs culturhistoricas e scientificas.

Ella tgeuadad digl asil s. Giusep a Cumpadials ha Sur Gion Battesta S i a l m festivau ils 26 d'october 1967 siu anniversari da 70 onns. Surtut en Surselva ein sias biaras, bein formuladas poesias, sias novellas e ses raquens e giugs bein enconuschents. Siu exprimiu senn pil bi e bien ei era semussaus sil camp digl art sacral, ha el gie renovau cun anim e capientscha differentas baselgias e capluttas.

La fin da schaner 1968 ha Revm. Sur Vicari general Ludovic S o l i v a cumpleniù 75 onns. Oriunds da Medel/Lucmagn ei igl ault dignitari sededicaus cun anim e perseveronza surtut alla pastoraziun. En quella ed en tut sias biaras scharschas eis el adina staus in attaschau fegl dalla mumma romontscha.

Igl empren di d'october 1967 ein bein biars Romontschs seregurdai en engrazieivladad da scolast e v. mistral Gieri V i n c e n z che ha saviu festivar quei di siu 70avel natalezi. Ton sin camp politic sco litterar ha igl uerbel giubilar protegiu e promoviu nossa viarva e cultura. Bugen deva igl anteriur president dil Cussegl grond a buna caschun siu votum per romontsch en nies parlament cantunal.

En sia patria engiadinesa ei scolast Wilhelm V i t a l passaus ils 24 d'avrel 1967 sur la sava digl otgavel decenni. Sper ina activitad da 50 onns ellas scolas primaras da Zuoz ha il giubilar collaborau alla redacziun da plirs cudischs da scola e regalau als Ladins numerusas historiettas e poesias. Nus debitein ad el engraziament per la cumpilaziun dil tom «Nossas Tarablas/Nossas praulas» e per la translaziun da Heidi I e II.